

& qu'il n'a pas esté enuoyé inutilement. Les infidelles conspirent contre le Prophete, mais Dieu fera tourner leur conspiration contre-eux, & ne le cognoistront pas. Patiente & tolere vn peu de temps les infidelles.

LE CHAPITRE DV HAVLT

*Et Puissant, contenant dix-sept versets,
escrit à la Meque.*

AV nom de Dieu clement & misericordieux. Exalte le nom de ton Seigneur hault & puissant, qui a proportionné tout ce qu'il a creé, il ordonne ce qu'il veut & conduit au droit chemin ceux qui luy sont agreable, il fait sortir les herbes de la terre, il les crée vertes, il les rend seiches, & les altere comme bon luy semble. Iete liray l'Alcoran, n'oublie de ce que tu liras que ce que Dieu voudra que tu en oublie, il sçait tout ce qui est tenu secret dedans le monde & tout ce qui est mis en euidence. Ie t'enseigneray la loi, presche l'Alcoran il profitera à celuy qui aura la crainte de Dieu deuant les yeux, ceux qui le mespriseront seront mal heureux, ils seront precipitez dans le feu d'Enfer où ils ne pourront ny viure ny mourir, & celuy qui embrassera la loy de Dieu, & qui se souuendra de son nom sera bien-heureux. Prie Dieu au temps ordonné. Certainement les gens de bien se

ront heritiers des biens de la terre, & des biens du Ciel qui sont tres-grands & eternels, cela est escrit aux anciens liures d'Abraham & de Moïse.

LE CHAPITRE DE LA COUVERTURE, contenant vingt-six versets, escrit à la Meque.

Gelaldin intitule ce Chapitre, le Chapitre du Jugement, parce que ce iour les damnez, seront couverts de feu & de peur. Voy Ekteri.

AV nom de Dieu clement & misericordieux. As-tu oüy parler de la couverture? Ce iour le visage des meschâs sera couvert d'affliction, ils entreront dedans le feu, qui est extremement chaud, ils beuront de l'eau bouillante, ils ne mangeront que des ronces & des espines, ils seront extremement maigres, & la faim ne les déliurera pas d'une infinité d'autres malheurs; Ce iour les bons seront remplis de contentement, ils seront recompensez de leurs peines dans le Paradis, ils n'entendront rien dire qui leur déplaïse, il verront courrir les fontaines couchez sur des lits esleuez, ils beuront dans de beaux verres appuyez sur des carreaux, sur des oreillers bien arrangez, & sur des lits bien parez. Les impiés ne confidereront-ils pas le miracle de la femelle du chameau?